

DOMENIE XXX «VIE PAL AN»

Antifone di jentrade Sal 104,3-4

Che il cûr si indalegri di ducj chei che a van cirint il Signôr.
Cirît il Signôr e la sô potence;
cirît di un continui la sô muse.

Colete

Diu onipotent e eterni,
fasinus cressi la fede, la sperance e la carità,
e, par podê vê ce che tu imprometis,
fasinus volê ben a ce che tu nus comandis.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jer 31,7-9

O torni a menâ dongje consolâts il vuarp e il strupiât.

Dal libri dal profete Jeremie
Il Signôr al dîs cussì:
«Dait sù cjantis di gjonde par Jacop
e scriulait pe prime des gjernaziis.
Fasêtlu sintî, scriulait e berlait:
Il Signôr al à salvât il so popul,
il rest di Israel».
Ve chi che o soi: o tornarai a menâju dongje
de tiere de tramontane,
ju met adun dai ultins confins dal mont.
Framieç di lôr al è il vuarp e il strupiât,
la femine che e spiete insiemi cu la parturient:
e je une fulugne di int che e torne chenti.
A son partîts vaint,
ju torni a menâ dongje consolâts:
ju torni a menâ ad ôr dai riui di aghe
par une strade plane, là che no si inçopedaran,
parcè che jo o soi un pari par Israel
e Efraim al è il gno primarûl.
Peraule di Diu.

SALM RESPONSORIÂL dal Salm 125

R. Il Signôr al à fat par nô grandis robis.

Cuant che il Signôr al à tornât
a menâ dongje i presonîrs di Sion,
nus pareve di insumiâsi.
In chê volte o vevin ducj bocje di ridi,
e la nestre lenghe e cjantave di gjonde. **R.**

In chê volte fra i forescj a disevin:
«Il Signôr al à fatis par lôr robononis!».
Il Signôr al à fat par nô robononis:
cetant contents che o jerin! **R.**

Torne a meti in sest il nestri destin, Signôr,
come i riui che tal Negheb a scorin.
Chei che vaint a semenin,
a seselaran plens di gjonde. **R.**

Chel che al puarte la semence di butâ
biel lant al vai;
invezit al torne indaûr dut legri
chel che i siei balçûi al puarte. **R.**

SECONDE LETURE Eb 5,1-6

Tu tu sês predi par simpri, sul stamp di Melchisedek.

De letare ai Ebreous

Ogni prin predi, cjapât sù tal mac dai oms, al è metût pal ben dai oms tes robis che a rivuardin Diu, par ufrî regâi e sacrificis pai pecjâts. Cussì lui al è in stât di vê dûl di chei che a son te ignorance e fûr di strade, stant che ancje lui al è vuluçât di pecjis; e propit par chel al scuen ufrî ancje par so cont sacrificis pai pecjâts, come che al fâs pal popul.

Nissun nol pò cjapâsi chest onôr; dome chel che al è clamât di Diu, come Aron. Istessamentri Crist no si à cjapât l'onôr di prin predi, ma jal à dât chel che i à dit: “Tu tu sês gno fi; jo vuê ti ài fat nassi”. Come che al dîs di un’altre bande: “Tu tu sês predi par simpri, sul stamp di Melchisedek”. Peraule di Diu.

CJANT AL VANZELI Zn 8,12

R. Aleluia, aleluia.

Jo o soi la lûs dal mont, al dîs il Signôr,
chel che al ven daûr di me al varà la lûs de vite.

R. Aleluia.

VANZELI Mc 10,46-52

Signôr, che o puedi viodi!

Dal vanzeli seont Marc

In chê volte, biel che Jesù cui siei dissepui e une grande fole al stave saltant fûr di Jeric, il fi di Timeu, Bartimeu, che al jere vuarp, al jere sentât ad ôr de strade a cirî la caritât. Sintût che al jere Jesù il Nazaren, al tacà a berlâ disint: «Jesù, fi di David, ve dûl di me!». Alore une vore di lôr a scomençarin a cridâi che al stes cidin; ma lui al berlave in mò plui fuart: «Fi di David, ve dûl di me!». Alore Jesù si fermà e al disè: «Clamaitlu chi!». A clamin il vuarp e i disin: «Dai, jeve sù che ti clame». Alore lui, butade vie la manteline, al saltà sù e al lè denant di Jesù. Jesù i disè: «Ce vuelistu che ti fasi?». I rispuindè il vuarp: «Signôr, che o puedi viodi!». Alore Jesù i disè: «Va, la tô fede ti à salvât». E a colp al viodè e si metè a lâi daûrji pe strade.

Peraule dal Signôr.

Su lis ufiertis

Cjale di bon voli, Signôr,
i regâi che o presentin a la tô maiestât,
par che l’ufierte dai tiei servidôrs
e ledi sù viers de tô glorie.
Par Crist nestri Signôr.

Antifone a la comunion cf. Sal 19,6

Si indalegrarìn de tô vitorie
e o gjoldarìn tal non dal nestri Diu.

O ben: cf. Ef 5,2

Crist nus à volût ben e si è ufiert par nô,
ufierte e sacrifici a Diu plen di bon odôr.

Daspò de comunion

I tiei sacraments, Signôr,
che a operin in nô ce che a significhin,
par che o podìn gjoldi te plenece de veretât
ce che cumò o fasìn in maniere velade.
Par Crist nestri Signôr.